

Wie du die aspect solt wissen.

Das xxxv. Capitel.

Wol dise propositio hieher nit gehört / so hab ichs dennoch den vnerfahren in der Astronomy von des grossen nutz wegen nit wollen pergen / darmit wil ich nur sagen was ein yeder aspect sey / so weystu dieselben bald zufinden / dann es ist not / wir geben auch in der Astronomy grosse acht darauff.

Aspectus,
Sunt - 5.

♁ Die coniunctio ist ein zusammenfügung zweyer planeten in ein zeichen vnd grad des thiercreiß.

Coniunctio
⌘

♁ Oppositio begibt sich wann zwen paneten gleich gegeneinander vber gesetzt sind / als wenn der Wonn im erstenn grad des Krebs ist / vnd die Sonn im erstenn grad des Steinbocks / so heysen wir dise anschawung oder disenn aspect ein Oppositio.

Oppositio
♁

* Sextilis ist ein aspect / der sich begibt so ein planet in ein zeichen were / vnd ein ander in ein andern zeychen das eben 60. grad des thiercreiß zwischen den zweyen planeten were / als nemlich wenn Saturnus im ersten grad des Widern ist / vnd Mars im ersten grad der zwilling / so begibt sich zwischen disen zweyen planeten der aspect / den wir Sextilem nennen.

Sextilis
* 60:
87:

♁ Quartus aber oder der viert aspect begibt sich wenn zwen planeten 90. grad / oder den vierdten teyl des thiercreiß von einander steend / als wenn der Jupiter im ersten grad des Widern / vñ Venus im ersten grad des Krebs were / so begibt sich diser vierdt aspect zwischen inen.

Quartus
◊

♁ Trinus oder der dritt aspect ist der / der sich begibt wenn zwen planeten ein dritteil des Circels von einander sind / als so Mercurius im ersten grad der Wag were / vnd die Sonn im ersten grad des Wassermans / so geschieht d drit aspect / Trinus genannt.

Trinus
△